

# COSMOGLOTTA

**Organ del Association International Cosmoglotta**  
**Consacrat al developation e propaganda del**  
**Lingue International Auxiliari Occidental**

Redaction e Administration: COSMOGLOTTA, Mauer bei Wien, Austria.  
Abonnement annual: 5 ö. S = 4 sv. fr = 0,75 doll. = 3 RM = 25 csl. K

**Annu VI**

**Juli-August 1927**

**Nr. 41 (4)**

## LI PROBLEMA DE LINGUE INTERNATIONAL

ha occupat li pensas de mult persones. Li unesim projecte, quel ha havet alcun success, es Volapük del canonico J. M. Schleyer (1881). Un grand progress representa ja li „Lingvo internacia“ de Dr. L. Zamenhof, pos nominat „Esperanto“ (1887) quel pro su facilitá e grandissim propaganda ha atin'et suficient attention in li munde. Ma li defectiv e innatural formes ha evocat li critica de divers competent persones.\*) Li esperantistes ha refusat omni reformas in lor lingue e pro to aparit mult nov projectes, quam Neutral, Universal, Ido, Esperantida, Romanal, Latino sine Flexione, etem, Medial etc. (totalmen circa 600 projectes), de queles Ido, un secession de Esperanto, ha atin'et relativmen grand propagation. Ma li ignorance del psychologic leyes del lingues, li ultralogistica de su parolformation ha ductet a mutilation del majorité del international paroles, in mult casus mem in plu radical maniere quam che Esperanto.

Li vermen practic **LINGUE INTERNATIONAL** deve esser comprensibil a omni person de occidental civilisation, anc sin studia anterior. Solmen un lingue ja hodie usabil in omni circumstanties, in [comercial anuncias e reclames, in changes de collectionistes del tot munde, in trafic e scientie posse contentar li postulationes del communicationes international. Un tal lingue es

## OCcidental

li max moderni forme del Lingue International. Li analytic gramatica, basat sur 30 annual scientific explorationes es li max simplic e facil possibil, e per su construction representa li summation e coronation del anterior experienties. Li regulari scientific derivation de omni international paroles compensa li aprension del desfacil Latin.

## Occidentales li democratic Latin!

Por un person qui ha aprendet Occidental, omni international sciential paroles in lor construction natural es clar quam cristall.

Occidental, li ovre de vive del baltic erudite Edgar de Wahl (Reval), es publicat in annu 1922.

\*) Ples vider Esperanto-paroles p. ex.: *chiam* (sempre), *kiom* (quant), *malebleco* (impossibilitá), *saneca* (sanitari), *kazo* (casu), *kaso* (casse), *caro* (tsar), *patrino* (matre), *nepre* (absolut), *malbona* (mal), *mallonga* (curt), *ege* (extrem), *boao* (boa), *firmao* (firma), *ekspansiebleco* (expansibilitá), *ekzekucisto* (executor), *aerflugisto* (aviator), *senarmiligho* (desarmation), *foresto* (absentie), *colo* (inch), *fraulo* (garson), *savinto* (salvator), *menso* (mente), *ghardeno* (jardin), *chirkaupolusa* (circumpolar), *daca* (decent), *laca* (fatigat), *dekoraciisto* (decorator), *bedaurinde* (regretabil), *cheestanta* (present), *anstatan* (vice).



# Curt gramatica de Occidental

**Pronunciation.** Vocales quam in german, italian, hispan etc., y quam vokal  
 ...sved y, german ū, frances u; y quam consonant == y angles, hispan; c ante e, i, y  
 == ts, in omni altri casus == k; g ante e, i, y == j frances, in altri casus quam g german;  
 h aspirat quam in angles, german; q quam in german e angles; s quam in frances;  
 v quam in angles e romanic; x == ks; z == ds; ch quam in angles e hispan; eu quam  
 in frances; n', l' tones molliat == frances gn, ille, j == j angles.

**Accentu:** Sur li vocal ante li ultim consonant. Li finition de plurale s ne  
 have influentie al accentu. Finitiones bil, ic, im, ul es inaccentuat. In altri casus li ac-  
 centu es scrit.

**Declination:** Per prepositiones de, a, per etc. Articuli(i), un.

**Adjective:** Resta sin accordation. Finition inobligatori i.

**Comparison:** Plu, max; minu, minst; finition -issim.

**Pronomines; personal:** mi-me, tu-te, il-le, illa-la, it, noi-nos, vo-  
 vos, ili-les; possessiv: mu, tu, su, nor, vor, lor.

**Verbe:** Infinitive -r, Participie: pres. -nt, perf. -t. Conjugation analytic  
 per auxiliaries: Preterit: fe, ha, futur: va, Conditional: vell, Imperativ:  
 ples, Optativ: mey. (Exemples: amar, mi ama, mi fe amar, il va amar, il mey amar,  
 mi (ha) amat, mi es amat, mi (ha) esset amat, va esser amat etc.).

**Adverbie:** egal al adjectiv o per finitiones -men, -li. Li Negation „ne“  
 sta direct ante li parol negat, che verbes ante li auxiliaries.

## Parolformation

**Composition:** direct o per vocales juntiv o e i.

### Prefixes

des- li contrari	mis- fals	re- de nov, ad comensa
dis- ad omni directiones	pre- ante	retro- ad dorso, in direction
in- (con adjectives) negation	pro- adavan	advers al antean

### Nuanciant Finitiones

-a action, loc, tempore; com- mun, collectiv; feminin che viventes	-o concret, material, spe- cial, singli; che viven- tes masculin	-u abstract, neutri, relativ -i adjectiv -e general e eufonic
--	--	---

### Sufixes: a) substantiv

-ade multité, serie, contenida	-da (con radic verbal) du- ration	-ie abstract conception
-age collectives (órdine)	-eria loc de profession	-iero portant
-agie (de verbes) concretisa- sation del activitá	-erie profession, afere,	-iere contentent
al'a collectives (sin órdine)	-ero person professional	-itá qualitá
-ard mal persones	-es inhabitant	-ité collectiv (totalité)
-ario person caracterisat per exteriori qualitá o officie	-essa dignitá feminin	-on person caracterisat per intern qualitá
-árium scientific collection	-ette negrand objectes, instrumentes	-or actent person
-atu institution o situation social o leyal, anc dignitá	-ess statu, qualitá	-ore statu de affecte, move
	-ia loc, land	-uor utensile, vase
		-ura concretisat action

### b) adjectiv

-aci inclinat	-atr simil	-iv havent li effect
-al general relation	-bil possibil	-nd a far
-an appartenent a	-ic essent	-ori destinat a
-ari conform, servent a	-in provenient, fat de,	-os rich in
-at (ad subst.) provisat per	consistent de	-ut exuberant

continuation sur pag III del covriment



## A Edgar de Wahl

A Vor 60-esim anniversarie li Occidentalistes transmise Vos cordial gratulationes e profund mersías pro Vor grandios e genial ovre a quel Vo consacrat plu quam 30 annus de Vor vive.

Vo sempre con clar vide e coragie persecuet Vor rect via, consciente que li idé de Occidental unquande va triumfar.

Ante 5 annus Vo publicat li principies del lingue e Vor pensas bentost ha trovat resonantie in li movement mundo-linguistic. Multes quel ja resignat pri li possibilitá de un systema acceptabil, con joya ha salutet Occidental quam final liberation ex antic, steril ideologies.

Vo es plu quam autor de un lingue artificial. Li adeptes quel penetra in li spiritu de Occidental, reconosse que ti idioma reflecte un nobil conception cultural.

Vo es ti qui es profetizat, instructor nos parlar in li idioma International quel ja vive latent in nor lingues natural; Vo ha realisat li miracul pentecostal por li homanité del 20-esim secul, quel, malgré su progresses technical e civilisatori, es incapabil intercomprender se in un gradu adequat al actual development de su medies de communication international.

Altri autores de L. I., sin respect al majestá del vive, provat obtener li solution per ignorar e anihilar li ja existent elementes international e natural tendenties a mundolingue. Pro to illi til hodie ne posset haver factic successe.

Vo fat crescer li lingue Occidental til harmonic integritá, sin alterar o destructer li valores ja comun al popules cultivant relationes international.

Ti trates del Lingue International dá nos li firm conviction de su victorie.

Essente idealist, Vo ne labora por gan'ar mersías, honores e profite material. Lontan del fanfarada, Vo consacrat Vor facultás, saventies e studias al idé far possibil per medie cultural li immediat mutual comprehension inter li homes del munde demanal.

Noi desira que Vo va receiver gratitude e recompensation pro Vor immens sacrificies al homanité.

Mey esser donat a Vos ancor mult annus de vive quam consiliator in medie de Vor disciples e pioneros quel con Vo servi al bell idé.

COSMOGLOTTA.



## Li du bases.

Sam quam li alchemistes del medieval epoc ne trovat ti aure, quel illi serchat, ma quele del fundamental veritàs del modern chemie, talmen it es li inobliviabil merite del grand e micri precursores del modern interlinguistica, que illi in fine comprehendet li necessitá constructer li Lingue International Auxiliari ex ti materiale, quel li existent international vocabularium presenta nos.

Ja li unesim prova introducter un lingue fundat sur ti ineliminabil **material base** del Lingue International, esset mortativ por Volapük e ductet a temporari victorie de Esperanto. Ma ti veritá esset fat obscur per li mantenentie in li crede del autor de Volapük, que lu principal por far li lingue facil esset li absentie de exceptiones in li grammatica, quel extra to deve esser li max simplic possibil secun mecanic schema. Caus to Zamenhof ne posset acceptar international paroles, ma solmen „radicas“, e talmen self destructet li material base.

Li precursores del naturalistes, quam Liptay e Lott, persistet consequentmen in li conservation del material base, ma illi ne posset dar un grammatica, contenen un derivation identic con ti del international paroles. Lor lingues pro to suffret de intern debilitá e ne esset vivicapabil.

Li immortal honore de har soluet ti cardinal desfacilitá del interlinguistic problema: li construction de un grammatica quel ne destructe li material base ma subtene it, appartene al autor del lingue Occidental, professor EDGAR DE WAHL.

Li regules queles il ha dat por li derivation del max international e frequent verbal substantives e adjectives, es ne solmen unic e genial, ma astonant simplic.

Ti cardinal desfacilitá ha provat soluer inter altris li famosi prof. Peano per ti maniere, que il simplicmen ne ha constructet un grammatica. It es clar, que to es impossibil in duration, proque li practica va extorder bentost li formation



de nov paroles e tande on ya deve haver un derivation e li problema demanda su solution.

Li material base ha esset tractat de Peano in un etymologisant o antiquisant direction, quel ductet al construction de lingue Latino sine Flexione. Contrari a it li lingue Occidental ea in un actualisant direction, to es peristentie in li factie nu existent parol-formes.

Ti consequentie sta in correct conformitá al inevitabil **social base** del Lingue International: li actual occidental cultura, su spiritu, postulationes e usationes. Ti base ha esset max clar e consequent accentuat solmen de prof. Edgar de Wahl. Infatigabilmen il ha declarat e explicat, que it es van postular que li europanes va retrovenir a un pronounciation de su paroles, quel li romanos usat 2000 annus retro, que li spiritu del international lingue deve esser in conformitá al lingual spiritu del progresset europan cultural lingues.

Li importantie de ti social base ha esset quasi completmen ignorat del esperantistes, queles mem ha revat pri creation de un nov esperantistic cultura, o del idistes, queles ne ha hesitat mem pri application de principies, queles sta in opposition als psychologic leyes de omni lingues.

Til nu nequi ha consacrat tant devot labor al scientific solution del interlinguistic problema, nequi monstrat un tal admirabil clarvidentie e independentie del pensas, nequi presentat al munde un systema in su contures e su detalies tam scientific motivat e tam artisticmen perfinat, quam ha fat Professor Edgar de Wahl, e noi pro to honora in il — li max grand interlinguist.

A. Z. Ramstedt.

---



E. de Wahl:

## Interlinguistic reminiscences.

Ja in puerin età mi hat idé de construction de un lingue. Plen de racontagies de Cooper, Gustave Aimard etc con mu camarades mi ludet american indianos, e conceptet li idé de un special jargon quasi indian por nor ludes. It esset fat del indian nómnes prendet del racontas, e completat per altri necessari paroles prendet de divers altri lingues. It havet un grammatica mixt-composit del antic-grec e del estonian. Ti lingue nequande esset usat proque mu camarades refusat aprender it.

Essente in gymnasia mi un die trovat un grammatica del tatar lingue, quel talmen interesset me que mi comensat li studie de ti lingue, e provat exercir it con li tataric colpolteros. Ma quancam mi possede ti grammatica ancor hodie, li studias ne ha ductet a alcun perfection, proque mi ne hat perseverantie in ti cose.

Essente de baltic origine e vivente li hiverne in Petersburg e li estive in Estonia, mi ja de puerin età hat occasion parlar quar lingues: russ, german, estonian, e frances proque in li dom de mu oncle, in quel mi ha passat mult estives, sempre esset un bonna frances. Ultra to mi devet studiar in gymnasia latin e grec. Ma mi deve constatar que li gymnasia ne posset satisfar mu general linguistic interesses, in contrari. Quande mi volet comensar li studia de linguistica in universitate in Petersburg, it apparet que un special cathedra por comparativ linguistica ne existet, ma solmen sectiones de germanistica e romanistica, quam adjuntion al classic philologie. Li unésim du annus esset destinat solmen al profund studia de classic lingues. In quel scolastic maniere to esset fat, on posse vider del facte, que li principal occupation durant li unésim annu esset li traduction ad latin del „revolta del cosacos de Yaic“, de Pushkin. Ti perspective abhorret me absolutmen del linguistic studia; Ulte to mu ardent interesse in ti témpore esset directet al mar e li marine, a quel mi volet consacrar me. Do mi studiat in universitate mathema-



tica, astronomia e physica, quam preparation por li carriere de marinero, e ultre to visitat anc altri lectiones anthropologic, historic etc e specialmen pri lingues: antiqui-egyptian e hispan. Depos li triésim annu de studia mi esset immatriculat parallel con li universitate anc in li academia de artes, u mi laborat in li pos-medi-die e vespere.

In fin del annu 1887 o comensa 1888 un colleg de mu patre ingeniero Rosenberger fat un discurs in li polytechnic societé pri li „Mundlingue“ Volapük a quel mu patre invitat me prender parte pro mu linguistic interesses. Mi esset tre sceptic pri tal cose, ma mi venit al discurse. Quancam Volapük me disgustat, li idé de un lingue international talmen interesset me, que mi strax fe insrir me in li cursu de Volapük arangeat per Rosenberger „plofed volapüka“. Pos fine del cursu e exámine mi recivet del „datuval“ (li grand inventor) un diploma de „tidel volapüka“ (instructor). Mi absolutmen ne esset content ye Volapük, e noi fe mult disputar con sr Rosenberger in li volapükistic vespere arangeat che il. Mi volet far divers changes etc quo ya tamen ne esset possibil in Vpk sin riscar li tot afere, ma mi esset talmen sub li suggestion del imens expansion del Vpk, quel tande havet ja 28 periodicos e gazetes in max divers landes, mem in China, que mi acceptet Vpk quam fact existent, e pro to comensat consacrar a it mu forties. Malgré li provas parlar Vpk, to ne atin'et grand success, e sr Rosenberger self, quancam diplomat „professor“ de Vpk e vice-presidente del academie „Kadem bevünetik volapüka“, ne esset grand mastro in ti arte. It es ver con li vocabularium e li regulari grammatica on posset scrir Vpk tre correct e mi hat correspondentie con divers persones, ma sin interesse. Li jurnales e libres mi bentost posset leer, tamen nequande sin usa total de lexico. In li parlada just li talmen laudat regulari grammatica pro su absolut foren caractere esset tre impeditiv, e li tro simil paroles e suffixes causat mult hesitation e miscomprehension. Durant ti témpore mi comensat composir un lexico de termines technical de marine, quel tamen ne atin'et su final perlaboration,



proque in marte 1888, un de mu collegs che li „vendels volapükik“ (volapük-vesperes), li studente Scheffler, monstrat me li micri brochure de Dr Esperanto, quel il hat videt in fenestre de libreria e comprat. Ti descovriton esset catastrophal, li revelation esset tro grand e subit, e mi devenit un ardent adherent. Ma immediatmen mi ha remarcet li duplic sense de *tian* quel posset significar li accusative de *tia* e li adverbie „tande“. Mi proposit por ti ultim sense prender *tiam*. Ulte to mi attentionat Dr Zamenhof pri quelc incoherenties in li vocabularium, p. ex. li du divers radicas *kresk* e *vaks* significat „crescer“ etc. Omni ti coses esset correctet secun mu indicationes in „Aldono al dua libro“ u ili esset qualificat quam simplic erras de printa, e *vaks* recivet li nov sensu de „cresce“. Ma ti qui save, que in D *wachsen* significa „cresce“ ne va just qualificar to quam *prin t-erra*. Nu pri tal micri coses mi ne esset interesset e nu comensa un intensiv labor por Esperanto. Ja quelc dies pos studia del 1-esim brochure de Esperanto noi du con Scheffler ja posset parlar in li universitate mult plu habil quam jamà in Volapük. Noi provat trans-convicter sr Rosenberger, ma il ja esset tro ligat con Vpk e refusat Espo, ma ja in li nu sequent congress de Vpk li cose fat sentir se e sr Rosenberger, quam nov-electet presidente del academie comensat constructer in collaboration con su collegos li reformat Volapük quel poy recivet li nomine de *Idiom Neutral*. Ma pri to ye altri occasion.

Mu Esperanto-periode es caracerisat per un grand correspondentie con Zamenhof, Grabowski, Geoghegan, Trompeter, Runstedt e divers altri persones. Specialmen li correpondentie con Geoghegan qui esset tande student in Oxford, crescet til immensi dimensiones. Mi memora que unvez mi recivet de il un epistul de 40 pàgines, scrit in su fin, clar, presc dessinat maniere. Inter altricos il auxiliat mult mu studias del lingue angles. A mu grandissim dolore ti grand correspondentie, quel vell nu haver un historic interesse pri li unésim témpores de Espo, es perdit. Mi conservat ti correspondentie international in un chest-bux in li comun subtegmente. Quande ja pos



mult annus mi exlogiat, mi remarcas que li bux ne esset plu. Probabilmen alqui ha besonat un bux e proque ti ne contenet altricos quam vel'i correspondentie hat prendet it, e forjettat li paperal'a. Li bux self ne presentat grand valore.

Un del unésim labores por Esperanto esset un curt lexico folial hispan-esperanto. Poy secuet li traduction de „Principino Mary“ de Lermontov, anc publicat per Zamenhof, proque mu propri medies esset tre restrictet. Anc un lexico de marine mi ha composit secun li ne perfinis volapükic, ma it naturalmen in ti unésim témpores ne esset ni possibil, ni necessari publicar it.

Ma li entusiasme por Esperanto ne hat obtusat mu critic qualitäts. Ja tande mi comprendet que ti systema un die va fallir quam Volapük, si on ne va far it absolut international, specialmen in li ja omniconosset cultur-paroles international, e mi comensat serchar vias por reparar ti manca, sin tamen voler separar me del moventie de Espo. In contrari! Mi persuadet per omni forties Dr. Zamenhof ja nu far li necessari reformas, quande li moventie esset ancor jun e in stadie de nascentie, proque plu noi attende plu desfacil va esser omni correcturas. In ti témpore (ultra mu correspondentie con Zamenhof, quel forsan es ancor conservat che il) mi scrit anc quelc articules linguistic pri reformas in „La Esperantisto“. Anc in li societé „Espero“, li unésim societé esperantistic in Petersburg, ye foundation de quel mi prendet parte<sup>1)</sup>, mi parlat pri necessità de reformas. Bentost tamen mu activ participation in li moventie suffret un interruption pro viages sur li naves-scoles. Durante ti viages mi hat occasion anc parlar Esperanto con un esperantist in Lisboa (Lissabon). Mi hat esperat far anc personal conossentie con mu Esperanto-amic R. Geoghegan, quel nu logiat in America, quande mi

---

<sup>1)</sup> In li official listas de ti societé mi ne es nominat quam un del fundatores, proque in ti témpore mi comensat pos fine del studia mu servicie quam aspirant in li Russian marine (flotte) e quam tal ne havet li jure esser membre de societès. Do mu relationes esset inofficial, ma pro to ne minu vivaci.



arrivat in New-York. Ma il logiat tro lontan de N. Y. e mi nequande posset vider ti car sympatic hom. Poy nor vias separat-se proque il restat fidel a Espo, e nor relationes cessat poc a poc.

Pos mu retorna del long viagie maritim mi denove comensat prender parte in li reformatoric movement de Espo, quel nu ja calculat un sufficient grand circul de reformistes.

In li unésim tempore Zamenhof semblat voler audir li critica de su adherentes e in li periodico „La Esperantisto“ comensat un polemica pri reformas in Espo. Quam on save ti polemica ductet Dr. Z. ad publicar self un nov reform-projecte quel támen **ne** prendet in attention li max fundamental question del regulari derivation del já existent international paroles e specialmen li international scrition e accentuation. Ma li fundamental erra, quel ne permisset a Zamenhof arrivar a un vermen bon systema esset li conservation del distinctiv finales secun grammatical categories. To on posse vider tre clarmen in su analyse de divers propositiones quam **a** por feminin, accentuat formes por li verbal témpores etc. Samli comprensibilmen nociv esset li principie de un littere un son. Ti principie ligat Z. talmen que mult bon propositiones, queles tre placet mem a Z. self, devet esser escartat.

Quam hom de practica Z. fe comprender que un disputation sin fine vell esser mortativ al lingue „in statu nascendi“ e pro to il posit li question rudmen: sive reformes, tande radicalmen e strax; sive conservatism absolut, tande nequande plu un parol pri reformas.

De tactic làtere un tal maniere esset absolutmen rect. Mi personalmen tande pensat que Z. per su tre radical reform-projecte quel tamen conservat li structura e principies, volet evocar li contradiction del inert masse quel sempre es li max grand in omni interpresiones, e talmen unvez por sempre evitar omni futur sucusses de su ovre. Forsan ti opinion es fals, ma mi opine, que si Z. vermen hat volet **i n t r o d u c t e r** su reformat projecte, il hat posset atin'er to per un poc plu long e consiliatori adhortation de su adherentes e plu detal'at motivation de su nov idés.



Mi ne esset content con li proposit reformas e postulat secution del leyes del linguistica etc.

Ti postulation de reformas sur principialmen altri fundamente e metodes ha causat a mu grand regrete ja ante li final drama un trublament inter nor amical relationes, queles nequande ha posset restituer se totalmen. On save que in ti tēmpore propositiones pri reformas esset acceptet in „La Esperantisto“ ja solmen quam payat annuncias.

Talmen li cose venit al grand final votation pri reformas. Li resultate de ti votation es sufficient expressiv; por reformas 107, contra 157, do 41% reformistes. Si on prende in calcul li inertie del masses ne volent denove aprender un altri lingue, it es un enorm percentage. Interessant es anc li distribution del voces. Contra reformas ha votat specialmen russes e poloneses, por reformas — germanes. Ma inter li votantes contra changes noi trova li nomines: de Beaufront, Grabowski, Lemaire, Shmurlo, Ahlberg, Kofman, — omni 6 conosset reformistes de plu tard tēmpore. To ancor vell augmentar li percentage del reformistes til plu quam 45% ! E con tal minimal majorité ha esset stabilisat li form final de Esperanto quel de presc un demí de su adherentes esset agnosceret quam insufficient ! Vermen un annullant judicie !

\* \* \*

Pos ti ja previsibil resultate de votation mi perdit omni interesse por Espo, quam ne plu perfectibil, e lassat it ear su vias e comensat mu propri labores.

Ante omnicos mi comensat un systematic studia del comparativ latin-romanica gramatica, derivation etc secun Dietz, Breal, Bailly, Körting, Schuchardt e divers tractates pri special questiones, anc general linguistica comparativ e psychologie secun Wundt. Unésimli it esset necessari statuer li clar e strict sense de omni suffixes. Do pri ti cose presc ne existet mem indicationes. Omnicos on devet far self. Do mi rubricat li divers suffixes e collectet paroles international e national in queles li suffixe esset usat. Ma proque ne existet mem lexicos gruppat in invers ordine i. e. secun li finales, ti labor esset tre



defectiv e custat immens patientie e van labor. Solmen quande li principal labor ja esset fat, mi ricevet conossentie del „Dictionnaire étymologique de la langue française, rimé par ordre alphabétique retrospectif“ de prof. Dr. Jos. Sanneg. Ti lexico esset un ver troviera por mi, ma . . ., anc ci mi hat mal chance. Pos li publication del unesim tom li autor morit, e mi ne posset plu jamá reciver conossentie pri li fate del manuscrit pret a printa. Ni li editor, ni li parentes posset auxiliar-me. Li prematurat morte de ti scientist es un ver catastrophe por li mundlinguistic moventie. It es presc li sol ouvrage, ex quel on posset hauster aliquos usabil por nor labores. It esset mu Sybillin libre, quancam defectiv, tamen de immens valore. Ma ti libre esset editet solmen in 1909 quande quam ja dit li max grand labor esset ja fat.

Ma mi ne esset li sol in serchada de un solution del node Gordian. Ja ante li finale del unésim periode de Espo hat comensat aparir divers projectes de nov mundlingues, sive species de reformat Esperanto, sive sur base del classic latin queles mi studiat, e con divers autores mi ha correspondet. Li max eminent de ti e forsan de omni til nu publicat projectes esset li „Mundelingua“ de J. Lott, 1890, totalmen basat sur li conservation del international paroles e ortografie. Li sol, ma por ti témpore tre grav e fatal manca esset li total absentie de parol-formation. Just pri li derivation mi multe correspondet con L., qui tamen ne videt li necessità de ti factor. Li resultate tamen esset que Lott in su témpore ne posset atin'er li sympaties e comprehension de su merite che li interessat publica.

It es nu significativ que un del max eminent esperantistes Ing. A. Grabowski, con quel mi long stat in correspondentie, pos li famosi votation poc a poc anc detornat se del Esperanto e comensat serchar un solution in li sam direction quam mi, advere un poc plu pur latin. Li idées de un scientific solution del question essent diffuset in li interlinguistic publica, ductet sr Max Wahren 1896 al edition de un mensual periodico „Linguist“, consacrat al linguistic reserches.



Ja tande divers autores quam Martin Bökl, Julius Frost, Josef Bernhaupt, J. Janowski etc expresset idées, queles solmen nu comensa devenir selfcomprehensibil. Specialmen interessant es secuer sr Grabowski in su evolution. Propagante su nov idé del „elementar-analyse“ del international paroles, il esset li unésim qui comensat scir su articules in su prov-dialecte. In li unésim témpore ti dialect „Modern latin“ conservat tamen tre mult particularitàs de Esperanto, p. ex. li finale o por substantives etc. Ma plu Grabowski liberat-se del influentie del Esperanto-construction, plu il acceptet omni latin irregulari participies e derivationes. Advere su lingue conservat un tre italic form. Ma on posse dir que ambi poloneses, Grabowski e Janowski representa quasi li precursores de prof. Peano con su Latino sine flexione. Janowski p. ex. vole preciser li election del paroles per li metode del latin ablativ, just quam che Peano.

Mi tamen serchat un synthese inter Zamenhof e Latin, un metode por derivar li international paroles secun un clar e strict régul. Mi volet desligar li Gordian node del centes de irregulari latin verbes, quel til nu per li imitatores del grand Alexandro: Zamenhof, Rosenberger, Beermann, Beaufront, etc esset cis et plu o minu habil. Ma cision ne es solution.

In ti témpore quande mi volet secuer li ver ideal linea monstrat per Zamenhof, it es: junter li regularità del grammatica con li naturalità del radicas, secuer su fin linguistic instincte, visibil in su „lingvaj respondoj“ e altri consilies, in ti tempore mi ricevét un epistul de sr Antoni Grabowski, quel es talmen caracteric por li evolution de ti conosset nobil samideano, que mi ne posse celar ti valorosi document human, anc si por li „fideluloj“ it ne va esser tre agreabil, e mi cita it „in plen“ in traduction ad Occidental:

Ivanovo-Vosnessensk 15/27 IX 1897.

Tre estimat Senior.

It joya me mult posser denov reprender nor correspondentie, e mi espera, que noi denove va aproximar-nos in nor opinionones queles, quam mi vide de Vor ultim scrit, homomente



es sufficient divergent. Si Vo rememora nor correspondentie in antean annus, Vo va remarcar, que max sovente Vo me ha traet adavan, mi esset quelcvez obstinat; poy mi marchat de-nove ye sam passu con Vos. Esque Vo nu es un poc fatigat? Esque mi nu deve vocar al car camarad: en avant!

In Vor epistul Vo tucha solmen un question, ma quel es characteristic por Vor present statupunctu, li suffix -ero (significant li person actent.) Vo illustra li question per un masse de exemples ex li max divers lingues: ier, aire, eur, er, eer, är, iere, ero, eiro ör, ar, ierz, arz, ajo, aro, ariu, ar', arz, decide Vos ye **-ero**, solmen „porco“ (porquero), „vacca“ (vaquero) e „perruca“ fa Vos desfacilitàs, e Vo questiona, if mi save alcun consilie. — Yes, un consilie mi save, e mi vell esser altmen injoyat, si Vo trova, que it es rect e secuend.

It esset un témpore quande mi vell har comensat serchar ancor 100 altri exemples por recomendar Vos li „international“ actor in form de un suffixe. Hodie, depos mi ha convictet me, que li sol possibil unitari L.I. jace ante nos in li Analytic Modern Latin, mu bon intentet, sinceri consilie es: Ples lassar li fabrication de Neovolapük al „Kadem bevünetik volapüka“, Dr. Beermann, Wahren e consortes. (cf. Janowski nr 8/9).

Si **mi** besona un „actor“, mi riguarda, qualmen il nomina se in li vivent latin, si il ha acceptet un national fonetica, tande Körting<sup>1)</sup> me di, qualmen it deve sonar in li unitari Modern-Latin. Sécretaire, sekretär es che mi secret-ar-i (us), il trova se in li secret-ar-i-at totalmen in su hem, li angles volunteer es voluntari(us), li „farbierz“ — tinct-or; talmen omnicos deveni natural, neutral e unitari, e li internationalità quel mi comprende quam comun-comprehensibilitá, va atin'er su max alt gradu. — Noi ne fabrica necos e limita nor labor ye li analyse. To quo mi posse, Vo anc posse. In casu de necessità ples prender, quam anc mi fa ad auxilie Körting, tande totalmen desapare Vos ti desfacilità, quel retene Vos del

<sup>1)</sup> Lateinisch-romanisches Wörterbuch von Gustav Körting.



scription de Vor articles in li neutral-lingue. Ples demetter li volapük-fortie-veste,\* de quel, quam mi attesta Vos con mersías, Vo me ha liberat, ples procrastinar ti labor systematic til li témpore quande Vo ja ha printat multcos in modern latin. Quant mult noi tande va profiter che Vor eminent linguistic disposition. Mi credi que Vo ne vell har lassat li precedentie a Janowski, si Vos ne vell har impedit un opinion, quel mi supposi che Vos, — que li lingues styra ad un unità, proque ili evolue secun cert leyes — in verità ili ea del unità, til pluralità, plu e plu divide se, mem che li singul grand culturlingues „li unità es solmen sur li papere“ (Sievers, Phonetik). Li unità do es in li preterite — li latin vive — splittrat, milvez modificat, si noi vole unitarmen aformar ti latin, quo li seniores del „Linguist“ nómina „international“, tande noi deve recurrer al reconstruction. Li comparison, quel producte ti seniores in Linguist, ne es linguistic labor, it es pur „Kees-fabrication“<sup>2)</sup>. Wahren ha basat su conjugation anc sur li Kees-principie (háben, ávoir, do „a“ haver).

Quam cordialmen mi vell joyar, si ti ci vez Vo vell lassar postraer Vos un poc, porque noi denove mey marchar adavan epol ad epol quam camarades.

Con max bon salutas e manupression

A. Grabowski.

P.S. A. Wahren, qui scrit me pri sofistica e inconsequentie mi hodie ha respondet, que il ne possede sufficient linguistic conossenties por posser just judicar mu opinionones, pro to il mey scriir me solmen afferic.“

\* \* \*

Noi ne posset tande totalmen accordar nor labores e mi devet laborar sol in li solution del nod. Grabowski bentost ha perdit se in li foreste del latin irregularitàs u il errat ancor quelc témpore e poy, desillusionat e disrevat de su aventurosi

<sup>2)</sup> In „Linguist“ esset un grand dispute pri li formes : caseo, fromage etc, e Beermann proposit quam sol possibil e vermen media: e international li form „kees“.



escapade, il retornat docil e penitent a su Canossa, i. e. a Esperanto. Ne hante self trovat li via, liberativ, e nu quam filio perdit recivent honores e dignitàs il resignat a su libertà e in fide e verità servit Zamenhof til su morte. It es significativ que pos su conversion il nequande plu ha scrit me. Probabilmen in li funde de su ánima esset un sentimento de gena. Quande mi hat ductet mu ovre til publication, mi serchat su adresse por misser le Kosmoglott e li clave de Occidental, e solmen captet saver que il esset morient, e bentost pos to il morit, sin posser quam Moisé almen jettar un regarde in li lande promesset.

Continuation secue.

### Li ovre de Edgar de Wahl.

Pro quo Occidental es vocat li max apt systema de Lingue International? Quo es lu nov e distin'tiv de Occ in comparison a su precursores Esperanto, Ido, Neutral, Universal etc? A ti questiones noi prova responder in li secuent lineas, secun quant to es possibil in un articul. Ti qui desira response plu detal'at, es retromisset a nor fontes, li jurnales Korespondens Internacional, Progress, The International Language, Progreso, Lingua Internationale, Discussiones de Academia pro Interlingua, Kosmoglott, etc. Li interlinguist quel con attention persecue retro li labores del autor de Occ. va constatar que il ja in su unésim publicationes ha esset consequent representante e protagonist del strict **naturalistic** direction. Ma E. de Wahl distin'e se de su collegos in li camp naturalistic per esser sempre anc un fervent defensor del **regularité**.

On questiona nos sovente pro quo EW ne ha publicat su systema plu bentost, ante que Esperanto ha atin'et su grand expansion. Antean Idistes save que EW ha prendet parte in li discussiones de Progreso de 1909 til 1912. Tande li témpor por Occ ancor ne esset matur. On ancor ne posset vider ad u va ducer li hyperlogic direction quel in Ido sub li energie duction de Dr. Couturat ha trovat su apotheose. Hodie, pos li fiasco de Ido, on save que ti direction ne es vivicapabil. Ma li cause cardinal de EW, ne publicar un complet exposition de su lingue, esset que il sempre ne fe esser content con li resultates. Il ancor limat pri final detal'es. Si li interesse por un LI in li publica ne vell har tam augmentat se, que mem li Liga de Naciones ha ocupat se pri ti problema, EW, quam il self di, nequande vell publicat su lingue. Ne li aspiration a fama e glorie ha esset su motive, ma solmen li desir a esser auxiliator in solution de un grav problema scientific e cultural pri quel li homanité til 1922 in van ha luctat.

Apu li Mundelingua de J. Lott, Universal de Dr. Molenaar es un del max modern systemas de LI. Abstraente de su ortografie tal-nominat fonetic, it es in su exterior aspecte tre simil a Occ. Li grand manca intern de Universal es, secun confession de Molenaar self, que it ne solue li problema del derivation verbal. Pro to il devet inserter in li vocabularium centes de irregulari derivates apu li radicas verbal, p. ex. *abdiker* + *ab-*



*dikazion* (Occ abdica-r, -tion), *admoner* + *admonizion* (Occ admoni-r, -tion), *afliger* + *afliktiv* + *aflikzion* (Occ afflict-er, -iv, -ion), *aserter* + *aserzion* (assert-er, -ion), *diferer* + *diferent* + *diferenz* + *diferenzial* (difere-r, -nt, -nt-i-e, -nt-i-al), *solver* + *solubl* (solu-er, -bil, -bilità).

Ing. Rosenberger, anc ne trovante li derivation-leyes, in su Idiom Neutral ha evitat ti exceptiones, viceante li international paroles per compilates arbitrari, p. ex. *skribasion*.

Ne-qui del lingue-autores ha pensat pri li possibilità trovar quelc facil regules por receiver li natural derivationes conosset in tot munde. Li autor de Occ ha soluet ti max desfacil problema. Quant profund inradicat es ancor hodie li antiqui conceptiones, to on posse constatar del fals rasones contra li **systema verbal** de Occ. On parla p. ex. pri 3 conjugationes in Occ, per -ar -ir, -er. Ma existe solmen un conjugation, sin exceptiones. Li tri vocales **a, i, e**, queles sta avan li finale **r** del infinitive, apartene al radica del parol e consequentli apari in omni formes del conjugation e omni derivates. Just ti conservation del 3 vocales es de primari importantie por li regulari derivation de omni international paroles; ili es quasi li fil de Ariadne inter omni semblant caos de irregularitās. It es un erra creder que li verbes in Occidental con ti divers vocalic finitiones del radica es plu desfacil a aprender. Nam ti persones quel ne conosse li verb, deve aprender it quam nov, junt con li vocale, e tande it es vermen absolut indifferent if ili deve aprender *vidi*, *vidar* o *vider*. Mem si on ha obliviat li vocale, on va trovar it facilmen per derivates quel on rememora se, p. ex. on trova *conversar* per *conversation*, *definir* per *definit*, *conferer* per *conferentie*. Si li parol international ne contene un tal vocal (p. ex. *pression*, *activ*, *conductor*), tande on usa un **e**: *presser*, *acter*, *conductor*.

Li mundolinguistes labora intensiv ja desde 40 annus, ma ne ha posset atin'er ci un solution: i. e. li **inregistration del natural international derivates in un simplic e regulari systema**, sin deformar les quam Esp, Ido, Idiom Neutral. Sive on mutila li paroles a grimasse-formes, sive on acumula un enorm masse de incoherent international paroles, sovente li du paroles parallel por li sam notion, p. ex. Esp: *observejo* + *observatorio*, *redaktisto* + *redaktoro* etc; in Ido ti duplettes (nominat anc paroles Mackensenic) es mem plu frequent: *regulilo* + *regulatoro*, *enkasigar* + *inkasar*, *toxikizar* + *intoxikar*, *garnisajo* + *garnituro* etc.

Occidental es li unic systema quel per su ingeniosi systematisation e poc simplic regules ha fat ordine in ti caos. Ma li majoritè del mundolinguistes ancor ne save que omni ti conosset paroles ne es extran, adoptet per inertie, o trovabil solmen in li lexico, quam che LsF (Latino sine Flexione de prof. Peano), ma cristallclari derivates del propri radicas. Solmen per Occ noi reconosse quant regularità on trova in li lingues vivent. It ne es necessari „far“ novi, „rational“ lingues quam Esp, Ido etc., li autores de queles funda sur negativ studia del lingues natural. E ili cert ne have li potentie imposar lor lingues artificial al publica.

De latere de strict internationalistes e LsF on sovente critica que **Occ prende quam radica verbal li form perfect**, ne sempre trovabil in lingues, p. ex. *restricter* vice *restringer*, *percepter* vice *perciper*, *producter* vice *producer*. Ma to es tre bon motivat e tutmen ne arbitrari. On ne posse haver du radicas in li lexico, un verbal e un perfect, quam p. ex. Universal e precipue Reform Neutral. Occidental prende li radica del perfect u existe un tal, pro que it in general es plu fort e trova-se in li derivationes. Ja in latin on remarca li desaparition del radica verbal e su substitution per li radica perfect, p. ex. *cantare* e *saltare*, derivat de *canere*



e salire. In li lingues romanal tal transitiones es ja plu sovent: infecter vice inficere, accepter vice accipere. Max sovent ti metode es incontrat in angles, p. ex. to discuss (discutere), confuse (confundere), suggest (suggerere), protect (protegere), correct (corrigere), act (agere), construct (construere) compress (comprimere), conduct (conducere). Angles have mem radicas verbal implicant latin perfect del conjugation per a: to moderate (Occ modera-r), educate (Occ educa-r), inundate etc. Do on vide que quancam in li evolution del verbe Occ es plu avansat quam li romanice lingues, it ne eat tam radical in ti direction quam li lingue angles o mem li systema Glott de Ing. v. Petrashevich, quel have: ego amat (mi ama).

EW ha statuet un plu natural metode fundamental del classification del verbes, vice li antean in transitiv, reflexiv, neutri etc. havent poc valore practic. Il accepte li sequent **psychologic base de classification: 1) verbes static e 2) verbes dynamic**. Li unesims monstra un statu constant e permanent, talmen que ne evente un alteration o mutation del statu, p. ex. esser, consistere, concordar, perseverar, provenir, conosser. Li duesims monstra que alquo evente, succede, deveni, es fat, que existe un mutation del statu, p. ex. venir, scriir, parlar, rotar, batter. Talmen il ha trovat un criterium general de parol-formation:

a) li verbes static forma substantives abstract, significant un statu characteristic per li radica del verbe, per li suffix -ie, juntet al participie de presente: dista-nt-ie, consiste-nt-ie, proveni-ent-ie, differe-nt-ie (On scribe difference, pro que on deriva regularimen adplu: differenti-al, differentiation).

b) li verbes dynamic forma 1) substantives significant li action, li process, per addition del suffix -ion al form del perfect: rot-a-t-ion, destruct-ion 2) substantives significant li constant statu atin'et, per addition del suffix -ur al form del perfect: struct-ur, rupt-ur, tons-ur.

**Li tri simplic regules por receiver li radica perfect es:**

On omisse li finale r o er del infinitive (indica-r, fini-r, distin'-er, vid-er, curr-er, adher-er, construct-er, miss-er). Si

1) li ultim littere es un vocal o consonant molliat (n'), on adjunte t (indica-t, fini-t, distin'-t),

2) li ultim littere es d o r, on muta it a s (vid-vis, curr-curs, adher-adhes).

3) in omni altri casus li rest es li radica perfect (construct, miss).

Per ti metode EW ricevet totalmen natural international derivatives (p. ex. indicat-ion, infinit-iv, distin't-ion, vis-ion, curs-ori, opin-ion, redactor, armat-ur, comparat-iv, adhes-ion, mission etc.) til pluri 10 milles. Omni irregulari verbes latin (exceptet forsan 5, rarmen usat), talmen es regularisat. E on posse far bon regulari **noviformationes, ne contrariant nor lingual sentiment**.

It es comprensibil que per li evolution mult paroles con -ion receive un sense plu concret, i. e. ne solmen li action, ma anc li metode, resultate, loc etc. p. ex.: construction, redaction. (Anc in Esp *administracio* significa action e persones). Anc li limite inter verbes static e dynamic naturalmen ne es absolut strict.

Un altri nov grand dominia quem EW quam unesim ha explorat secun metodes scientific, es li **exact signification del affixes** del international paroles, in max grand parte venient ex latin. Li specialistes del filologie ha fat presc ne-cos in ti direction. EW serchat li sense del affixes



### c) verbal

-ar 1. provisar 2. usar un instrumente 3. seceer 4. (de persones) acter quam  
5. (de adjectives e participies) factitiv

-ear status dynamic

-etar diminutiv-frequentativ

-ijar devenit, far-se

-isar far tal

Regul principal: Li radic verbal trova-se per omission del final r.  
Li radic perfect trova se in maniere secuent: On omisse li final r o er. Si

1. li ultim littere es un vocal o consonant molliat (n'), on adjunte t.

2. li ultim littere es d o r, on muta it ye s.

3. in omni altri casus li rest es li radic perfect.

Li suffixes -ion, -iv, -or, -ori, -ur es adjuntet al radic perfect, ama-r ama-t,  
credi-r credi-t, vid-er vis, curr-er curs, adopt-er adopt, opin-er opin, construct-er  
construct. Ex ili es format li international paroles: amat-or, a-credit-iv, vis-ion, excurs-  
ion, curs-iv, adopt-iv, opin-ion, construct-or, construct-iv, construct-ion, struct-ura.

## Opiniones pri Occidental

Prof. Dr. phil. Karl Schüppel, presidente  
del Esperanto-Societ  Parchim:

Occidental finli es li systema quel  
satisf  li postulationes del scientie inter-  
linguistica... Pos  $\frac{3}{4}$  annual studie mi ha  
resoluet transir a Occidental quancam li  
gigantic labore del propagation deve ancor  
esser interprendet. Ma pos l'aparition de  
un tal unic lingue international resta nos  
solmen li alternative completmen resignar  
pri li id  mundolingual o combatter por  
Occidental. Mi es pret auxiliar Vos....

Karl Scheithauer, Leipzig:

Per Occidental li scope del evolution  
del Lingue International sembla esser atin'et.  
Ti lingue finli es li satisfaction de un ardent  
desir del humanit .

Magda Hoppstock-Huth, presidente del  
German Section del International Liga  
de f minas por pace e libert :

Occidental es li un sim lingue inter-  
national quel on posse subtener.

Prof. Dr. A. L. Gu rard, Universitate  
Stanford, California:

Occidental significa un decisiv pro-  
gress. It sembla me que ti lingue representa  
un passu in li rect direction.

Prof. Dr. Albert Saareste, Universitate  
Tartu-Dorpat:

Mi deve attestar que in li amasse de  
hodial creat lingues international, Occi-  
dental es li max facilmen comprensibil. Li

letura de textus redactet in ti lingue ne ha  
causat me minimal desfacilit . Mi gratula  
sr. E. de Wahl cordialmen pro ti labor-  
fructe honorant nor comun patria e mi  
crede in li progress e victorie de ti lingue.

Ivan Locnikar, Maribor:

Pos curt studia de Vor „Ucebnice“  
mi ha esset surprisat pri li bon qualitas de  
Occidental, quel vermen es creat in spiritu  
european e pro to posse servir anc quam  
lingue panamerican auxiliari. Su immediat  
comprensibilit  es insuperabil... Florea e  
prospera li grand ovre del genial scientie  
nordic mann! Esse Occidental li lingue  
comun del Europa futuri!

Anton Fuchs, forjero (74 annus), Wien:

It es un trist situation que on vole sa-  
turar li laboreros per li talmi Esperanto,  
quel presenta les ne-cos in direction xeno-  
lexicologic e mem corrupte lor poc saventies  
lingual e li caractere del propagandistes,  
devent usar indigni metodes por apoyar li  
mal cose. Esperanto fa impossibil omni se-  
rios studia de un modern lingue natural.  
Occidental, in contrari, es un bon scol por  
preparar se por ti lingues e por comprender  
li terminos technic, li acquisition de queles  
aperte por li laborero li portas al scientie  
e a plu alt nivell social e cultural. Mi va  
ne negligear directer li attention de ducto-  
res de laboreros al bell e facil idioma  
Occidental, li Latin del Democratie.



per analysation ne de quelc paroles, ma de omni existent tales, contra que li lingue-inventores ha contentat se per superficial observation. Ma quande ili durant li usation ha remarcet abstrusitas, ili soluet li affere simplicmen per declarar que li lingues natural es inlogic e caotic, ergo ili esse irregulabil. — It es facil compensar un parol mal selectet per un altri, ma un suffix miscomprendet o un regul fals statuet, posse deformar centes e milles de paroles international.

Esperanto dà al suffix -ist li signification de un person quel ocupa se professionalmen pri li cose expresset per li radica; talmen ha resultat: *redaktisto*, *frizisto*, *konstruktisto*, *libristo*. Ma un plu exact exploration monstra que li originari signification es li nomine de un person quel ocupa se con un -ism, in direction spiritual o psychic, religion, politica, scientie, arte, sport etc., p. ex. altruist, pacifist, esperantist, terrorist, solist. Por indicar precipue li manual professiones, artises, on prefere li suffix -ero: barbero, lavera, juvelero etc.

Esp e Ido usa -in quam suffix por feminin; ma per li analyse del international paroles resulta que -in indica provenientie, p. ex.: marin, bernhardin, alpin, serpentin, argentin. On trova it anc in A leathern, D ledern de altgerman *lederin* (cuirin), D A golden de *guldin* (aurin); mem Esp have li sense secret in *fibrino*, *sangvina*, Ido anc in *saponino*, *kanina*.

Ex paroles existent in natural lingues: mordaci, tenaci, vivaci, voraci, furtaci, veraci, efficaci, lunaci, Occ trae li suffix -aci por „inclinat a“, por quel Esp e Ido usa li deform -ema (de F aimer): *mordema* etc.

Por expresser „possibilità“ Dr. Zamenhof prendet -ebla, quasi form medial inter -ibl e -abl, p. ex. *ekspansiebla* (expansibil) e *transportebla* (transportabil). Mersi al apart systema verbal de Occ noi receive li natural international paroles per li un suffix -bil: cura-bil (Esp *kuracebla*), infallibil (*neerarpova*), ama-bil-ità (Esp *amindeco*).

Li Occ-suffix -on indica un person caracterisat per un qualità; on trova it in li natural paroles: fanfaron S, miron, laceron (I), spion, herisson F. Esp usa in simil sense -ulo: *barbulo* (barbon, barbat), *vertebrulo* (vertebrat), *virgulino* (virgina).

Esp-istes reprocha a Occ que it have tro mult suffixes, tam mult ne es necessari. Ma EW ne ha inventet ni un suffix; il solmen trovat e constatat li sense del elements vivent in international paroles, e elevat les al conscie por usation. Quo ne es vivicapabil in un lingue, to va morir. In omni lingues, divers formes deveni antiquat e finli ili successivmen desappari total. E ne omni suffixes latin es vivent generalmen; quelc es usat solmen in special terminos, p. ex. -nd (i. e. ne *enda* quam Esp-Ido, anc ne -and) in: confirma-nd, doctorand, examinand, preparand, integrand, multiplicand, curand, demonstrand; divide-nd, dividende, minuend, subtraend. Ma on ne va dir „fand“ vice „a far.“ Lu sam vale anc pri omni scientific affixoides de grec origine: epi- (sur, super), equi- (egal), eu- (bon), hyper- (super norm), hypo- (sub norm), hom(e)o- (sam), iso- (egal), kako- (mal), kali- (bell), meta- (trans), neo- (nov), ortho- (rect), pan- (omni), para- (a latere), pasi- (ad omnis), peri- (circum), poly- (mult), proto- (unesim), pseudo- (fals), syn- (con), tele- (lontan), -oid (simil), -phil (amant), -phor (portant) etc. etc.

Li creation del L. I. ne postula decreter principies, quam ti del a priori suffixes de Esp o su artificial conjugation per -as (presente), -is (preterite), -os (futur) o li correlativ tabelle de Dr. Zamenhof: *kiu* (qui), *kie* (u), *kiom* (quant), *tial* (pro to), *tiom* (tant), *chio* (omni-cos), *chuij* (omnis) etc.

**Pseudoscientie decrete, ver scientie sercha.**



Ante omni-cos es necessari investigar to quo ja es comun e international, sin egard al origine de lu comun.

It es un utopie far felici li povres per anihilar li richesse del altris. Ti metode aporta null-cos, anc ne al proletario. Un extirpation p. ex. del tresore de existent terminos scientific de origine greco-latin vell causar un cultural regresse del spiritu european. Solmen per novcreationes de notiones e per to anc per nov paroles, li germanes, slaves e asianes va inrichar li mundo-lingue, ne per violentios remotion e anihilation. Si p. ex. in botanica un explorator trova un serie de plantes quel ne incadra se in li existent classification, il ne va dir que to es capricie de natura, que li natura es cieca e inlogic, samli il ne va exterminar ti plantes por salvar li classification. E si il vell far tal coses, nequi vell considerar le quam seriosi scientist.

Un nociv **prejudicie** in interlinguistica ha esset li doctrine: **un son - un signe; un signe --- un son**. Null lingue existe quel satisfá ti postulation. Zamenhof ha rejettat li littere x, pro que x representa du sones, e il scri ks, kz. Ma esque li signe c in Esp anc ne es t-s? Esque it ne vell esser plu consequent scriir tsaro, si on have eksperimento? Esque li son n ne es un altri in li parol *vango* quam *dento*? O esque on vole fortiar li homes parlar n in *danko* sempre per li punte del lingue?

Un lingue con ortografie absolut fonetic vell haver un alfabeto con cent litteres. Li **duplic pronunciation de c** in Occ es quasi totalmen international e ultre to mantene li etymologic transparentie del paroles. Ples egardar que li lingues italian e hispan malgre fonetic scrition ne ha abolit c. On ne posse asserter que li simplic regul de Occ fa serios desfacilitás a slaves etc.: c ante e, i, y es a pronunciar quam ts, in altri casus: k. Li Ll es sempre aprendet quam lingue extran, i. e. per scrit. E in tal casu it es mult plu facil aprender li lingue con auxilie de gramatica e de connexe etymologic. E just tal connex grammatical es totalmen destructet per dissolution de c in du litteres: k e c (s, z). Compara p. ex. tchec: voják - vojáci (soldat - soldates) o li caos in Ido: *kritiko* - *kriticismo*, *katolika* - *katolikismo*, ma unitari Occ: critic - criticism, catholic - catholicism, electric - electricitá, publicist - publication, periodic - periodicitá, duplicat - duplicitá, vacca - vaccinar.

LsF demanda li antiqui latin pronunciation: *circa* per „kirka,” *et cetera* per „et ketera.” Ma tal pronunciation es tam inacceptabil quam ti de Esp, quel pronuncia *paco* per „patso,” *caro* per „tsaro.”

Li advantages de **etymologic ortografie** es tam important, que finli anc Lott e Rosenberger in lor duesim projectes ha adoptet it, in consequentie del convictiv argumentes exposit de EW, quam mi self hat occasion constatar ex lor correspondentie.

Do li internationalitá del paroles relate li scrition, ne li pronunciation divers in li divers lingues natural. Internationalitá del pronunciation presc ne existe. Ma li ortografie del international paroles es presc li sam in omni lingues cultural. On do deve conservar li ortografie e simplificar li pronunciation. Li constant international ortografie in li Ll ducte a unitari international fonetism. On posse tolerar micri modificationes in li pronunciation, p. ex. t vice ts in confirma-t-ion. Ma on ne posse recomendar un alterat scrition, quel destructe li etymologic coherentie del international derivates con li radicas Occidental. Ples comparar li sam process che lingues occidental quel incorpora-se modern paroles con li extran scrition, ma con pronunciation accomodat, p. ex. A avoir-du-pois (scrit F, pronunc. A), F five-o'clocker (scrit A, pron. F).



Occ es in alt gradu plu comprensibil pro mantener li **duplic consonantes** por indicar curt vocal precedent, o discernen divers paroles international e indicar s fort, p. ex.: casse (Esp *kaso*), casu (*kazo*), carr (*charo*), car (*kara*).

Li LI (anc Esp) es un idioma con essentialmen latin parolmateriale. E un lingue quasi latinid on ne posse scrir per ortografie polones, si on ne vole receiver grimasse-charades.

Li **regul de accentuation** in Occ, que on posi li accentu sur li vocale ante li ultim consonante, desembarassa nos de innatural sones del Esp-paroles: *radio* (*radio*), *firmao* (*firma*), *statuo* (*statue*), *familio* (*familie*).

Un altri principie quel tre impedit li evolution in LI es li devise: **un parol - un notion; un notion - un parol**. To es solmen un reva, **nequande realisabil**. Ti san constatation on hodie fortunosen ja posse leer anc in li presse esperantistic. Li redactor de „Heroldo de Esperanto“ scri in su nr 3, 1927: „Regretabilmen li principie „Un parol, un signification“ es ruptet plu quam un vez, anc in Esperanto. Cause es, que Esperanto (til cert gradu) es lingue natural. Li afere tamen ne es dangerous, nam presc sempre li contextu escarta omni dubita. Comprensibilmen apartene a Vos, o usar o ne usar alcun expression con essentie dubitativ“

It es clar que on ne posse escamotar li parol „sol“ quel es inradicat per international derivates: solità, solitari, solo, solist, isolat, desolat. Ma noi have anc un serie de conosset scientific terminos: solar constante, insolation, solsticie, parasol. Ci li radica representa nor stelle dial, Occ: sole. It vell esser un barbarism exterminar ti parol existent per su derivates e introducter p. ex. quam Esp e Ido: *suno*. To es impossibil. Li lingues in verità have tendentie a multisensità. Un lingue quel ha realisat li principie de absolut unisensità, vell posseder milliones de paroles, do vell esser inparlabil. Anc Esp nequande posse abolir omni homonymes, vide p. ex. su radica *bor'*, significant „forar“ e li chemic element „bor,“ o su nov parol *Paneuropo*, quel ne es D Broteuropa, ma „Tuteuropa.“

Comprensibilmen un L. I. deve haver alcun precision e on deve evitar homonymes, u possibil. Ma Esp e Ido dis-hacca li gordian node per deformationes: *plateno* (platin), *faruno* (farine), *pordo* (porta) etc.

Un del max fatal consequenties in Esp e Ido ha causat li innatural curasse de **obligativ finales** -o, -a, -e etc. por substantives, adjectives, adverbs etc. un metode incontrat in null lingue. Ergo un eclatant prova que it es inutil. Just li substantive, quel es haustet de omni lingues del terre, ne posse suportar un tal restriction e etiketation abominabil quam Esp: *shaho* shah pers, *pashaho* pashà, *orangutano* orang-utan malay, *emuo* emu nov-seland, *kanguruo* cangurú austra, *kolibro* colibri caraib, *kvago* quagga hottentot, *nadiro* nadir arab, *husaro* husar hungar, *gejsho* geisha japan, *nirvano* nirvana indic, *edelvejso* edelweiss germ.

Li conservation de **divers finales** in maniere de Occ have practical valore **por discernen simil paroles**: sol: sole, port: porta: porte (Esp: *haveno*: *pordo*: *sendkosto*), monstru: (de)monstra(tion) (Esp: *monstro*: *(el)montr(ado)*).

Li **postulation de logica** in li LI es un erra fatal, nam si vermen li logica deve esser lu decisiv, tande li LI es necos por li simplic e ne-instructet hom, e li ideal vell esser un lingue a priori, simil al filosofic systema Ro de sr. Foster. Li logica es un del max defacil metodes de pensar, e pro to es tam rar in su application. It apari solmen che novi factes, quando on ne posse acter secun instincte e custome. On ne posse



parlar si on deve li tot tēmpore pensar, qualmen formar logicalmen li paroles. Solmen quande on usa li rect paroles instinctivmen, on posse directer su total attention in li materie self. Ma por atin'er un instinctiv parlada, on deve aplicar li natural leyes demonstrat per li psychologie: ili es **custome** e **analogie** (ne logica). Ti lingue va esser aprendet max rapidmen, quel contene max mult acostumat e conosset formes, e li max facil parolformation es ti de analogie con conosset paroles ja international. Ili dà li criterie e li exemple de parolformation quel on deve secuer. — Li Ll existe ne por parlar secun regules de logica, ma por comprender unaltru in maniere max facil.

Junt con li exploration del suffixes EW ha fat un **total revision** del lexico. Mult fals paroles de Esp adver ja es eliminat in Ido. Ti labores del Ido-Akademio forsan es li unic usabil por Occ, quancam grand parte anc devet esser modificat pro li deformationes causat per li Esp-corsette del gramatical parolmarcas e misinterpretat suffixes, conservat in Ido.

Dr. Zamenhof ha selectet li paroles de Esp ex li cardinal lingues de Europa, frances, german, angles, anc polones, russ, p. e *nepre* (amputat R neprenemo, Occ absolut). Do anc Esp es quasi solmen un european lingue e ne m u n d o -lingue, quam on sin jure ama asserter contra Occ. Esp have anc latin radicas quel hodie es totalmen mort p. ex. *ansero* (Occ gans, D Gans, S ganso, P ganso, A goose, Sv gas), *sed* (Occ ma, I ma, S mas, P mas, F mais, Ho maar, Sv men), anc grec *kaj* por Occ e(t), international per „etc.“

Pri adoption de paroles ex angles on deve esser apartmen caut pro li grand differenties inter scrition e pronunciation. Esp-paroles *najtingalo* (A nightingale) e *birdo* (A bird) monstra manca de unità in li metode de adaptation.

Ido ha electet su paroles secun li principie de prof. Jespersen: „Max facil por li max multis.“ EW ha preciset ti principie per „**max facil por ti qui sta in international relationes.**“ Ne li max mult homes es a contar quel conosse un parol; nam tande li Ll vell esser precipue chines. Quam ja indica li nómine, li lingue Occidental concentra se al Occidente. Nam li majorité del international parolmaterialie es occidental e **li civilisation mundan hodie es ancor occidental.** Un lingue **tut-mundan**, i. e. quel egarda omni lingues, chines, japanes, arab, **es un utopie.** Noi ja mentionat, anc Esp ha haustet solmen ex european fontes. E it es ne-ver que it offerta al ne-european plu mult quam Occ. In contrari. Per su parolduplettes por un e sam sense (*aviadisto* e *aerflugisto*, *delegacio* e *delegitaro*, *direkcio* e *direktoraro* e *direktistaro*, *garnituro* e *garnajho*) it solmen confuse li esperantistes ne-conosset un european lingue. E to quo in Esperanto ne es european, to anc ne es asian, ma artificial, inventet.

Un cardinal factor estetic e practic in un lingue es su **styl**, quel in li Ll ja es dat per li latin origine del preponderant majorité del international paroles. Pro to li incuidat implantation de german paroles ne-international quam in Esp: *hundeca* (canin), *knabino* (puella, flicca), *anstatau* (vice), *bedaurinde* (regretabil), es grav mispresnes e deve repugnar omni persones con natural instincte.

Anc Ido, essent compilat de pluri persones, have tal mancas. Lingues creat de singul persones posse esser plu homogen. Etsi pluri persones save plu mult quam un, tamen ili mem junt ne deve esser plu capabil quam un sol. Un genie posse crear plu grandios ovres quam grand societès, si il utiliza li experienties de su precursores, i. e. si il labora



scientificmen. Comitès sol posse crear ne-cos. Ili solmen completa li nov ovre e poli su acutages e aspritàs, sam quam li undes poli li rocc. Por nov-creation es necessari concentration de energie con alt potentiale; accumulation de masses sol ne suffice.

Li **homogenità** de un lingue ne deve esser consequentie de que omni paroles es de provenientie unic, p. ex. latin. It consiste in li style a quel es submisset omni paroles, anc ti de origine foren.

Latino sine flexione de prof. Peano (LsF), por evitar hybridic caractere del lingue, prende su paroles solmen de Latin. Ma on save que anc Latin, specialmen li Latin del scientie, have mult elementes del grec. It es van purificar li Latin, quam quelc persones vole far pri paroles: homosexual, television, glacial cosmogonie. On ne posse p. ex. dir pur-grec *telescopie*, nam to ja es altri-cos quam „television.“ Anc pur-grec *crystallo-cosmogonie* vice „glacial cosmogonie“ es misguidant, nam solmen li grecos comprende „crystallo“ quam glacie, ma hodie it significa pezze de minerale in form de polyedre regulari o symmetric. Lingues evolue. E li sense del paroles changea. Ples memorar quo ha significat li parol „sanction“ ante li guerre e quo it es hodie! Un parol ne explica li notion representat, ma es solmen etikette traditional sur it. D Dampfer es vapor-nave e ne locomotive, quancam ti ci sense forsan vell esser plu proxim. Anc in Esp it es tradition que *vagonaro* es D Zug e ne Wagenpark (*chiuj vagonoj*), logicalmen justificat per *homaro* (*chiuj homoj*).

Angles, essent un lingue quasi mixt, have li max mult paroles hybridic, p. ex. germanic radicas con romanice suffixes: druncard, drinkable, eatable, talkative, free-lovism, backwardation, womanize etc. It do ne va dever tro chocar si Occ have analog: mannic, trincabil.

LsF prende li latin vocabul *bello* por Occ „guerre,“ trovant-se in li romanice lingues e essent afin a A war. *Bell(um)* vive in *belligerante* e *bellicoso*. Ma it ne posse esser adoptet in li LI, pro su confusion con li adjectiv „bell“ (F beau, belle, D schön), quel es international mult plu conosset qnam li purmen scientific belligerante e bellicoso.

L'internationalità del paroles deve esser direct, immediat, sensibil ne solmen por docti latinistes, ma por omni persones instructet, anc si ili ne conosse latin. Departiente del latin on ne-quande posse arivar a un **modern LI**, quel contene bon  $\frac{1}{3}$  de paroles ne-latin. Circa un demi de omni paroles latin es mort por sempre e ne posse esser revivificat. Li rot del historie ne torna a retro.

Por li suffixes grammatical, p. ex. de conjugation, on ne trova international formes. A un hom ne conosset Esp, li formes arbitrari del verbes in Esp es sempre incomprendibil. EW ingeniosmen ha circum-navigat ti desfacilitàs per li **metode analytic**. Li max grand clarità posse esser atin'et si li paroles es invariabil tal quam on posse trovar les in li vocabularium, contra que li mult incorporat particules adombra li radica, quo fa desfacil li deschifration del parol, comp. Esp *amos* e Occ „va amar“. Li max grand gradu de analytism ha atin'et li lingues chinesi e anglesi — lingues de alt e seriosi cultura. E it es clar que un lingue quel pretende devenir lingue del international relationes, ne posse haver tro long parolcombinations, perdiente per to su clarità. In li declination li analytism es ja talmen comun, que anc in li LI it es generalmen conosset. Ma in li conjugation Occ es ja mult plu analytic quam p. ex. Esp. To have anc un altri valorosi qualità. On save que omni natural lingues possede sempre un grand quantité de irregulari formes, precipue in li conjugation del verbes max frequent. Do li regularisation per particules



prepositional quam in Occ es li max apt, contra que li innatural suffixes de Esp *skribis* o Idiom Neutral (*skribav*) sempre va chocar li publica.

Li finale **-s**, quel in Esp e Ido indica li finit verbe, es international conosset quam **pluralsigne**, trovabil in angles, hispan, portugales, frances, hollandes, german etc.

Un frase sempre repetit es que li LI deve esser **facilmen apren-sibil**. Li autor de Esp volet satisfar ti postulation per simplic mechanic gramatica con poc regules e restriction del numere del radicas til un minimum, usante derivates mem por max frequent notiones: *mallonga* por curt, *malhona* por mal, *vagonaro* por tren, *patrino* por matre. Ma li practicabil e facil aplication es plu grav quam li facil aprension. Nam li tẽmpore del aplication del LI va esser 100-plic plu long quam ti del aprension. Pro to it es gravissim haver curt radic-paroles por idẽes usat omni die. Li tẽmpore por aprension del LI es ja tam curt que quelc hores plu mult lude null rol contra li long tẽmpore del vive. Ulte to li ver facilitã de un regul gramatical resulta ne de su simplicitã intern e minimum de regules, ma solmen per aplication in practica. It es plu facil parlar secun 5 regules secun li custome quam per un regul contra li custome. Li du o tri regules de accentuation in Occ junt es plu facil quam li un de Esp.

De lãtere de Esperantistes on sublinea que un vital social factor por li movement de LI es haver un firm e inchangeabil base, quel p. ex. Zamenhof statuet per su *Fundamento de Esperanto*, essent intangibil e obligatori por omni scritor. Ti fundamente, consistent de decretes arbitrari de su autor es gardat per li plu o minu perseverant discipline del adeptes. **Li fundamente de Occidental es li vivent international paroles e li leyes derivat ex ili.** Ti natural fundamente es plu stabil quam li principies statuet de Dr Zamenhof, quel postula que on mey dir *internacia* e *cheestanta* vice „international“ e „present“. Occ apoya se sur li accustomation de 500 millions europãnes e americanes. Esperanto vole fortiar les parlar contra natura e custome. Ma li inertie del 500 millions va esser plu fort quam li dictatura del esperantistes.

Quancam Occ in mult punctus representa un revolution in li conceptiones reyent pri mundolingue; it es li unic systema de LI quel es conform al exploration-resultates de Wilhelm Wundt pri li psychologie del lingues, it es **satisfaction e ponte al modern linguistica**, ne bar-rage chocant.

To es li garantie al success.

E. Pigal.

## 40 annus Esperanto.

**Apert epistul al 19-esim Universal Congress de Esperanto**  
de Siegmund Ortony.

Del 28 juli til 4 august va evenir in Danzig li 19-esim Universal Esperanto Congress. A ti occasion in „Wiener Handelsblatt“ organ dial del Austrian comercie, li 25, 27, 28 junio ha aparit de sr. Siegmund Ortony un serie de articules contra Esp sub titul: „Ueber die Notwendigkeit und Mõglichkeit der Schaffung einer



verwertbaren internationalen Handelssprache" (Pri li necessità e possibilità del creation de un practicabil lingue international commercial) ex quel noi in secuent publica quelc interessant partes in version Occ. Li autor, ne conoscent Occ, proposi quam L. I. un simplificat angles. On talmen posse constatar, que ne solmen noi declara Esp-o quam inacceptibil, ma que anc persones ne prendente parte activ in li movement interlinguistic, have li sam opinion.

Red.

Denove un Esperanto-congress aproxima-se e denove es a suposir, que li practic effectiv resultates anc de ti congress ne va esser essentialmen altri quam ti del 18 (!) ja evenit.

Li scrittor de ti lineas es un entusiast por li necessità de un lingue international, inbrassant li terre e il ocupa se pri lingual studies desde pluri deci-annus e ha exactmen observat anc Esperanto durant mult annus.

Il constata, inrefutabilmen basat sur ti conscientios, profund e expert observationes, que Esperanto t r e n e c e s s i t a u n r e f o r m a t i o n . It deve esser ameliorat si it vole aproximar su scop: devenir un vermen usabil, international instrument de comprehension. Nam Esperanto es infinitmen lontan de ti scop, malgrè su existentie durant 40 annus, malgrè omni illusiones. It dece a seriosi mannes reconnosser li verità, ne timer it e meditar pri remedie si es reconosset, que li via intrat es sin chances.

Mi es officario in un firma quel have extendet relationes in tot munde civilisat. It con fervore durant six annus fat constataciones relatent Esperanto e sur li base de ili, il constata, que li practic e factic successe de Esperanto es presc null. De cent Esperanto-lettres apen un havet alcun positiv, real base comercial, durant que 99 ha persecuet solmen pur idealistic scopes por Esperanto, p. ex. demandar esperantic printagies e similes. Ma it esset evidentmen clar che omni cent, que li scritores ne ha esset fortiat usar Esperanto, nam — 80 percent ha venit de Germania e li ceteri 20 percent in max grand parte venit de landes, con queles on sin desfacilità posse coresponder in angles, in minu grand parte in frances. Li resultate de ti constatacion esset, que li mentionat institute ha annullat in li budget-etate li expense-posto por Esperanto pro esser inutil.

In li interesse de un real e universal medie de intercomprehension it es necessari un inprejudicat conoscentie e poy far li logic deductiones. Nam homes rasonosi deve consentir, que li 19-esim congress va haver tam poc successes, quam li 18-esim, nam in altri casu ili vell aparit ja desde long. Un objectiv observator deve comprender finli, que li propagation solmen idealistic del actual Esperanto ne have un minimal valore positiv in li sense de un mundolingue, specialmen de un lingue comercial. Ulte to li Esperanto-congresses es monomaniac. parlante sempre solmen pri li propaganda de Esperanto, in su form actual. Contra omni logic necessità evolutionari ili ha statuet li tese, que un modification in li structura de Esperanto ne es permisset; per to chascun de ti arrangeamentes es morti-nascet.

Si on vole ne chassar un fantom, ma quam seriosi hom atin'er un scope it ne have utilità continuar vehicular sur un via evidentmen nullvalorant, ma on deve questionar se ù es li causes, que Esperanto quam real mundo-lingue til nu ne havet success. To es visibil clarmen a omni hom inprejudicat. Per to li total manca de chances por Esperanto



es evident. On ples do considerar, que it ne have minimal valore si mem tre mult homes apropria se li saventie de Esperanto, solmen por scrir in Esperanto a alcun hom, con qui on posse intercomprender-se in un lingue ja existen'.

Li max simplic logica doce, que es plu just, si li considerabil minorité de homes ancor ne conosent li mundo-lingue ja existent (i. e. angles, secun li opinion del autor. Red.) vell aprender ti ci lingue quam demandar, que su conossores mey apropiar se un nov lingue, de quel li aprension es mult plu defacil quam on opine in general: To deve esser explicitmen accentuat. It es un fact, que homes ineducat aprende Esperanto plu facilmen quam instructetes, pro que ili minu senti li artificialità de Esperanto. Li studia de Esperanto — tal quam it es nu — ne es util, ma nociv, pro que it detene milles de homes aprender un real mundo-lingue, quel exhaustivmen compensa li un poc plu grand pena del aprension.

Automaticmen apari li question, esque on deve avansar sur ti via sin esperantie e sin chances quam til nu e, si ne, quo altricos deve evenir por aproximar li scope aspirat. Ma ante omnicos li principie deve reyer. ne esser cie cavaicante sur principies, ma visar solmen li real scope sin omni principiari opiniones e sin esser impedit per trublant idealism. Li congress deve haver li coragie a reconosentie e acter conform. Til que on ne reconosse, que Esperanto durant li 40 annus de su existentie ne ha satisfat li esperas, queles on posit in it e pro to anc ne adplu va satisfar les, on solmen dracha vacui pal'e. Si on vide, que on ha aberrat, tande on deve resolut retornar e serchar un altri via. Trovar ti via, to es li deve del nov congress, in altri casu it va finir tam nere-marcet, quam omni altris.

Zamenhof in su grand pensation mund-inbrassant ha fat un psychologic grand errore: il volet contentar omnis e pro to il ha aportat ne suficient a nequi causante per li artificial pelmel de paroles un total impossibil situation. Li vocabularium es li fundament de un lingue e deve esser constructet in maniere natural, durant que ti de Esperanto representa un monstruosi artificial'a. Arbitrarimen, sin regul e sin intim sentiment natural, il prendet li paroles de lingues vivent e mort e pro to ili es tre defacil a memorar.

Precipue li preferentie del german (*tago, nur, bedaŭri, ŝajni*), etsi to es honorant por noi, ha esset un grand misprende, quel demolit li necessari uniformità. It esset certmen un erra utilizar anc mort lingues.

Secun li judicie general li fatal „j“ del plurale deprava Esperanto e on vell posset substituer it plu bon per li angles „s“.

Li max grand defecte de Esperanto es, que it ne ha contentat se esser un lingue auxiliari, volente representar un nov perfect lingue equipat per omni fin nuancies e finesses. Per to it transpassa tro mult li possibil limite. Quam exagerat pedantie es p. ex. li contrast exactmen accentuat inter adjective e adverbie o li ostentativ marcation del objective. To es detal'es quel existe ne mem in german. Tal defacilitas have null scope.

Qual bell perspectives revela-se, si on pensa, que per un lingue international unitari on vell posser vicear anc li studia del mort lingues e inbrassar li tot homanité per un sol ligament.

Trad. Ms.



## Chronica.

A occasion del semanes festiv, sr. E. de Wahl ha visitat Wien, secunte un invitation de Verein Deutschösterreichischer Ingenieure, Kosmo-technische Gesellschaft, Arbeitsgemeinschaft für Schrift und Sprache e Association Cosmoglotta Comité Central. Il fat du interessant discourses arangeat de ti societés li 14 e 17 junio in li grand sala del Histologic Institute del Universitate. Li unésim discursus ha tractat un nov problema cultural e physical sub li titul „Li mission del technica“. In li duesim discursus, accompan'at de projectiones, li autor de Occidental ha parlat coram 80 auditores, pri li historie del lingue international; il refutat in maniere eloquent e convictiv li general prejudicies contra un lingue del typ Occidental. Li du discursus, hant esset acceptet con grand sympatie e rich applause, va aparir anc in printa. In fine del duesim convenida, ductet de Ing. Emil Jung, presidente del Societé de Ingenieros, sr. Walter Smital, Esperanto-lector che Radio Wien, ha demandat parol por presentar long series de tabelles statistic pri li successes del Esperantistes. Ma li publico, ancor fascinat per li 2-horic clar e objectiv explicationes e li totalmen nov perspectives apertet de sr. EW., con indignation e unanimita ha refusat un tal contra-argumentation. Tamen sr. Smital ne posset responder li question del presidente, quant Esperantistes existe in li munde.

„Heroldo de Esperanto“, nr 25, ha publicat un raporte pri ti eventes in Wien, concludente per declarar que li afere de Esp es ja tam difuset, que Occ ne va victoriar li entusiasme del esperantistes. Nu noi ne vole trublir li felicie del esperantistes e va offertar Occ solmen a ti persones qui ne vole accepter Esp.

Association Cosmoglotta ha intrat successosi transactiones con un del max grand editorias del continente por comensar propaganda de Occidental sur max larg base. Datales secue in circulares al colaboradores.

In li movement de Ido ha evenit un schisma. Li secretario del Ido-Union secun „Mondo“ nr 10 declara li novelectet Ido-Akademio quam inlejal e refusa li material subtenentie. Li presidente del Union ha demissionat. Li presidente del Ido-Akademio ha proposit su demission ja plu antey. Prof. Jespersen e sr. Janotta ne adplu es membres del Akademio. Li reformaci Idistes electet „Mondo“ quam organ; li adversari, conservativ partie es ductet de sr. Noetzli, organ „Ido“, Zürich. Li Ido-jurnal „Linguo Internaciona“, Praha, ha cessat aparir.

Sr. de Beaufront, „precipua autoro di Ido“ e secretario del Ido-Akademio, secundat de sr. J. Guignon, vice-secretario del Akademio, in „Ido“, junio, responde a mu articul „Regretabil Ido“, Cgl nr 40. Ili have li coragie mantener li assertion que in Ido li radica de „sintezo esas nomo, ne verbo.“ Sapienti sat.

Prof. Dr. Karl Schüppel, presidente del Esperanto-Societé Parchim, nu fervent colaborator de Cosmoglotta, in li liga-convenida del nord-german esperantistes in Schwerin li 26 mai ha pledat por Occ e con successe ha refutat li fals assertiones pri nor lingue.

Dr. Peipers-Köln ha parlat por Occ li 13 mai in Ido-Societé Paris. In li discussion ha prenet parte sr. L. M. de Guesnet, J. Linzbach e a.

Comte Dr. Ernő Zichy-Acs, pionero de Cosmoglotta in Hungaria, ha publicat un long articul pri Occ con textus comparativ in „Magyarország“, Budapest, 21 junio. Anc altri jurnales hungarian ha raportat detal'at pri nor lingue.



Sr. F. Pátek, inspector de scoles, in „Český učitel“, Praha, 16 junio, ha insertet un articulo tre instructiv por Occ.

Sr. Yoshi Ishiguro, editor de „Esperanto en Nipponlando“, Tokio, in li japanes periodic „Nov era“, april, publica un articulo pri L. I., laudante Occ; il constata que li pluralsigne — s de Occ es max international.

„Academia pro Interlingua“, nr 3, contene textus comparativ in Ls F e Occ, con posremarca: „Resulta concordantia in generale; differentia es pauco.“

Miss Pankhurst in „The Morning Post“, London, 29 april, scri que quancam li lingue angles have scition discordant del fonetica, un simplification del ortografie angles vell esser un vandalism. (Ad nota por ti qui vole adaptar angles quam lingue universal per fonetisar su scition).

Li conosset linguist Hugo Schuchardt, prominent specialist in lingues mixt (creolic) e membre del Delegation por l'adoption de un Lingue International Auxiliari, ha morit in Graz, li 21 april.

Editoria T. Fisher-Unwin, Ltd, London, peti nos publicar que li libre „A Short History of the International Language Movement“ de Prof. Dr. A. L. Guerard es exhaustet.

#### **Abonnamentes, contributiones e subventiones por Cosmoglotta.**

Rev. H. L. B.-Chemnitz: 3 RM; T. Wh.-Ealing: 3 d; F. C. van A.-Oud-Gastel: 5 ö. S; G. P.-Bergisdorf b. Z.: 5 ö. S; Prof. B. M.-Roma: 6 ö. S; C. P.-St. Pölten: 3 ö. S; J. S.-Tallinn: 5 ö. S; R. W.-Argenteuil: 20 fr; O. P.-Tallinn: 3 RM; J. P.-Tallinn: 3 RM; W. Sch.-Lauenburg: 5 ö. S; I. L.-Selnica o. D.: 5 ö. S; C. G.-Warszawa: 10 Zl.

Pro manca de loc noi regretabilmen ha devet procrastinar li articules: Dr. Karl Schüppel: Pedagogic valore de Occidental. A. Z. Ramstedt: Preterite per -t. E. de Wahl: Exceptiones e li vive. Julian Prorók: Stabilità e evolution. E. de Wahl: Analytic e syntetic. E. de Wahl: Li possibil futur evolution de L. I. Astralist nro 1: Quel lingue es suficient bon por li popul? Prof. Rosselló-Ordines: Replica pri Interlingua Systematic. Ernst Graber: Neo-Volapük (Esperanto). A. Z. Ramstedt: Li articulo li.

Al present nr de Cgl ne es anexet un Supplement. Li secuent SaC, nr 10, va esser dismisset con Cgl nr 42.

#### **„Deutsche Briefgesellschaft“ alliate de Cosmoglotta.**

Al present nr es anexet por nor german abonates un prospecte e un cart de mandate por „Deutsche Briefgesellschaft“ (German Societè de Correspondentie). Noi specialmen fa atenter pri li importantie de ti apart institution con quel nor Association vole laborar comun por li afere de Occidental. Ti societè edite li excellent organ „Deutsche Briefzeitung“, quel va propagar Occidental anc trans li limites de Germania, in tot munde. Li redactor del jurnal have li intention etablisser un special rubrica por un „Section de Correspondentie Occidental“ por iniciar e promoer relationes per scrit e personal inter adeptes e interessates de Occidental. It es un bell successe por nor lingue posseder un tal alliate e noi peti nor amicos adherer al „Deutsche Briefgesellschaft, Section de Correspondentie Occidental“, Naunhof b. Leipzig, Germ., In ceteri li adhesion a ti societè have un grand valore por omni intellectuale qui persecue ancor quicunc altri interesses ideal o practic.



## KOSMOGLOTT (precursor del jurnal COSMOGLOTTA)

contene li max important articules pri L. I. e por e contra Occidental  
Absolut necessari por omni scientific interesset mundolinguist.

Precie del annucollectes:

1922 e 1923 complet . . . . .	à 7 frs. sv.
Con mancant nr 1 . . . . .	à 4 " "
Defectiv collectiones . . . . .	à 2 " "
1924, 1925, 1926 complet . . . . .	à 2 " "
Complet collection de 1922 til 1926, junt . . .	20 " "

Recivibil che li autor: E. de Wahl, Eha 10, Reval, Estonia.

### Occidental-Literatur

Curt grammatica-claves de Occidental in lingues Angles, Frances, German, Russ, Tchec à 0,30 ö. S (0,25 frs. sv.)

E. de Wahl: Radicarium directiv de Occidental in 8 lingues ADFIPRSSv 5 ö. S (4 frs. sv.)

Jean Chanaud: Index français-Occidental au Radicarium. 1 ö. S (0,75 frs. sv.)

J. A. Kajš: Praktický jazyk světových styků Occidental. 0,60 ö. S (Cena 3 Kc., vaz. 6 Kc.)

A. Z. Ramstedt: Nyckel till Occidental. 1 ö. S (0,75 frs. sv.)

J. Gär: Wörterbuch Deutsch-Occidental ha apparit 9 livra-  
rations à 0,30 ö. S (0,25 frs. sv.)

J. Linzbach: Transcendent Algebra, 1,30 ö. S (1 fr. sv.)

Rabindranath Thákur (Tagore): Nationalism in Occidente. Autorisat traduction de A. Toman. Precie 1,30 ö. S (1 fr. sv.)

Dr. R. N. Coudenhove-Kalergi: Li Paneuropian Manifest. Autorisat traduction de E. Moess. 1,30 ö. S (1 fr. sv.)

J. Robert e E. Pigal: Der Weg zur Europäischen Verständigungssprache (Li via al lingue del europian intercomprension) OCCIDENTAL, in D Esperanto e Occ. 1,60 ö. S (1,25 frs. sv.)

A. Z. Ramstedt: Occidental — ett västerländskt kulturspråk. 0,30 ö. S (0,25 frs. sv.)

Recivibil che:

Cosmoglotta Mauer b. Wien, Austria.

Comité Explorativ de L. I. Eha 10, Reval, Estonia.

Société Interlinguistic Villagatan 25, Helsingfors, Finland.

Editoria Occidental Česká 32, Brno, Tchechoslovacia.

Por postal expenses ples junter 10%.

Informationes 2 respons-cupones.